

“A duti quii che ‘i ha i CD co’ le mie canson”



by: Aldo Tognon - volume n. 2

...Gnissun sènte più incuo de ‘i mie CD canson,
ma se le polarà vignì archiviae de garghe parte
cu sà che un zorno, magari in sotovose,
gargun turni a cantàne un ritornelo.

Me no’ sarè, ‘chè prima o dopo tòca, ma
se de canson n’ he fàte quasi cinquanta,
sia de laguna, amor e altro no’ dìgo,
garguna de siguro restarà in mente.

Cussì tra diese, vinti o trenta ani,
cô de moderno e computerizao ‘l Festival sarà,
'nte 'l vecio archivio gargun 'ndarà sgrapiando
e, 'tao 'l PiCì o 'l Aipod, el 'scoltarà.

E sarà testi de paluo, cason, sieli e tramunti
e valser, blues, pop-rock ma ninte tanghi...
'che me piaveva i Bitle e i Roliston', Elvis o Vasco
e i melodici italiani me fèva solo fresco.

E 'lora ... si, siguro i dizarà: “zè antichitae,
zè strafanici, zè storie ormai passae...
ne 'vemo zà sintie de 'ste canson a milanta...
zè duto roba vecia che ormai nissun più canta !”

Cussì, ciapai i CD e i spartiti musicali
duto fracao e serao 'nt' un scatolon sarà
e, dopo un do preghiere e un ato de dolore,
de sora i scivarà: “ qui giace “Gravo mòre”...

* * *



" FESTIVAL "

“ Tinpi moderni “

*Gravo: “Isola del sole,
di poeti e marinai”
‘desso quìi bei tinpi i xe passai.
‘Sto paese xe diverso,
à gambiao generassion,
zoventù moderna e costrussion.*

*Gravo sogna, Gravo ‘ncantao,
Gravo xe un quadro ben piturao.
Gravo laguna, Gravo corcai:
Gravo, ricordi desmentegai.*

*Strae, boteghe e ristoranti,
tanta zente e visi novi:
i “foresti” à fâto l’ invasion.
Xe sparìe dute le arte
e anche i canti e le preghiere;
no se vêghe i veci sul barcon.*

*Gravo: baruffe sui giornai.
Gravo vendùia, i giurni contai.
Gravo disfàgia, ruspa e picòn.
Gravo: soldi e maledission.
Gravo: soldi e maledission.
Gravo: un nome sul giornal.
Gravo: spiaggia e l’ ospedal,
camper, auto e la stagion;
solo rabia e confusion !*

*‘Sto paese xe diverso,
à gambiao generassion,
zoventù moderna e costrussion.
Xe sparìe dute le arte
e anche i canti e le preghiere;
no se vêghe i veci sul barcon.*

*Gravo sogna, Gravo ‘ncantao:
Gravo xe un quadro ben piturao.
Gravo laguna, Gravo corcai:
Gravo, ricordi desmentegai.
Gravo, ricordi desmentegai.
Gravo, ricordi desmentegai.*

“ Gravo mòre ... “

*Gravo mòre,
copàgia a tradimento,
massàgia in t’un momento:
xe un refolo de vento
che no ’l sospira più.*

*Gravo mòre,
de invidia ‘nvelenàgia,
de duti conquistàgia e
vendùà co’ la so’ zente,
‘negàgia de ‘l cemento.*

*Graisani !
cantè le vècie canson de i pescauri,
quele de le antiche tradission.
Cantèle pe’ voltri e no pe’ i “siuri”,
perchè ìli no i sà chè che vol dî:
“esse Graisan !”*

*Gravo mòre,
laguna violentàgia
de i “barbari” ‘saltàgia
e méssa a fero e fogo:
distrùti i so’ tesori !
Gravo mòre,
‘sta rosa de laguna
bramàgia e tormentagia,
‘sto fior puzao su’l mar
‘passio senpre de più.*

*Graisani !
finìla de sbranàve tra voltri,
volève più ben e
tignìve d’aconto ’l amicissia.
Dovè salvàve el vostro paese,
no stè fàvelo rubâ de quii che no pòl dî:
“me son Graisan !”
Gravo mòre,
Gravo mòre ...*

“ L’ultimo pescaor “

*El sol al smorsa i so’ raggi,
lenta la cala la sera;
su la laguna ‘ndoragia,
sola, la vâ ‘na batela.
Al vòl tornâ al so’ cason,
forsi per l’ultima volta,
xe duto coverto de erbasse,
ma che règia la gera ‘na volta !
E inte’l rosso de’l sielo,
inte’l tramonto più belo,
vâ, l’ultimo pescaor,
vâ, l’ultimo pescaor.*

*El più bel fior de’l paese
portao in quel nîo de laguna;
amor che pòrta la vita:
vose de mamuli in fasse.
Mar, senpre mar, piova o vento che sia,
no gera santi che fòssa;
‘ndâ se doveva, co’ rede e cugùli:
gargossa a casa se deve portâ !
E fòssa ‘l vento ‘l più teso
e le restie le più alte,
la sova barca svolava
cô torneva a cason.*

*La vela, sgionfa, sburteva
cô a Gravo i torneva pe' festa;
a messa, preghiera e dopo alegria
co' canti e biceri de vin.
A tardi, za note, co'l scuro 'i torneva,
i rimi vogheva piàn piàn,
sgiunfi de vin e de stanchessa
ma inte' i cuori speranse e ilusion.....
E fòssa 'l vento 'l più teso
e le restie le più alte,
la sova barca svolava
cô torneva a cason.*

*Adesso che 'l remo 'l pesa de più
e 'l vento xe senpre più teso,
che l'onda xe senpre più alta
e 'l sielo 'l se fà più scuro:
inte'l rosso de'l sielo,
inte'l tramonto più belo,
và, l'ultimo pescaor,
và l'ultimo pescaor,
và.....*

*

*

*

“ No ve cognossèmo più “

*...E le storie che ‘l tempo ‘l scrive
no le xe più quele.
La vita, ‘l mar, i tenporai
noltri li cognossèmo,
ma i zuvini de ‘desso
cù li cognosse più ?*

*No ve cognossèmo più !
compagne le parole,
compagni i vostri visi,
co’ i stissi oci de nissun:
ne sè comò foresti
vignui de oltre tere.*

*....E xe senpre alegria
e senpre festa, ma
drento ‘l cuor e la testa
‘vè un tormento:
la vita la xe là,
che la ve ‘speta.*

*....E ‘desso su ‘sti mari
de risti ne xe tanti,
xe tenporai che spàca
e che te ‘fonda:
quante vite ghitae,
vite strassae !*

*No, no ve capimo più !
dizè che savè duto
sensa ‘vê mai ‘nparao:
issà la vela e ‘ndà
torzio xe belo,
ma vòl savuo navegâ !*

*....E vita e soldi e amor
‘desso i xe façili,
se vende anche ilusiòn
che dura un àtimo:
ma pe’ pagàle vòl
‘na vita intiera !*

Insieme, graisani !

*Che vòl dî
pe' i graisani
vîve a Gravo ?
Che ne fâ
sinî inte' l sangue
questo mar ?
Su la pele
bruza 'l sal
de mîle ani,
drento 'i oci
'vèmo stienzere
de sol.*

*Case vècie
ormai sparîe,
sofegao xe
'l campanil;
aque scure in
'sta laguna:
e de Gravo resta
solo un isola
che no xe !*

*Che vol dî
pe' i graisani
questa Gravo ?
Resta 'ncora
gargossa drento
'l cuor ?
Senpre in meno
e missiài tra
mîle visi,
no xe più
drento de noltri
un cuor scoldao de' l sol.*

*Svegliève, graisani !
tignive 'sta
vostra cità,
no stè 'bandonala,
no stè regalalgia a
qualunque che vièn !
Insieme, graisani !
strenzève, stè
insieme vissìn e
tignive 'sto mondo:
graisani per senpre
o per senpre sparî !*

Insieme, graisani !

“Do stele”

*Do veci in cusina, la lume smorsagia,
'na tola, do carieghe de pagia;
su'l muro, 'npicagia, la foto scurîa
de tinpi de guera, in tera de Russia.*

*Sul fogo de'l spagher 'na vecia pignata;
la crensa scrostagia e garghe scartosso;
'na svegia che bâte el tempo che passa
e poche parole de tinpi luntani.
I visi che i mostra el tempo vissùo,
de mundi fadigâ e de poco passùo;
su'i oci 'l soriso de vita sincera
de quando co' poco felissi se gera.*

*Le mane, 'ncalîe, un poco le trema
cô sfiora 'l so' viso e i so' lavri che prega;
ma quanti ricordi comò quando, a zugno,
un fior pe'l so' amor le strenzeva inte'l pugno!*

*I lavri i se move, parole passae
sintîe mîle volte e pùo 'smentegae;
o fâsse capî co' un moto del viso,
co' solo un'ociada o un verto soriso.
E i sguardi che sogna de tinpi luntani,
de zuvini alegri e de amuri nostrani;
de canti, de valser, de corse su i prai,
de note stelae e de basi robai!*

*La camera vecia, su, in quela sufita,
co' drento i sigriti de duta 'na vita;
e in tanto silensio de un mar senza fine,
inte'l sielo, vissine, le brîla do stele.....*

“ Xe un posto ... “

*Xe un posto su'l reparo,
un dosso in mezo 'l mar,
'ndola le sove storie
i veci i vâ a contâ;
i varda drito avanti,
lontan de 'l orizzonte,
la vita che xe stàgia
e quel che 'i à di fronte...*

*A vêghe co' i so' oci
un tempo ormai lontan,
sintî le so' parole :
de un zòvene graisan.
Co'l so' sangue sintî
la forza de 'l amor
a vîve i sovi zurni
che ancòra i resta in cuor.*

*Le vele e le batèle
su'l prao de verde mar
o stele in mezo a stele,
la note, drento 'l blù.
Vogando, vento in prova,
le arte de calâ;
fâ 'l alba fora in mar,
pùo a Gravo velisâ.-*

*Xe questo un sogno?
o xe nostalgia
de “Gravo nostro”
che: mai 'ndarè via!
Se questo inte'l sangue
xe de ogni graisan,
me vogio che 'sta Gravo
sia anche per gno figio
che 'l nassarà doman.-*

*E sievuli che solta
comò lampi de arzento,
sgarzete bianche in volo
liziere più de'l vento.
Tramunti rosso sangue,
i dossi comò 'l oro;
el sirocal che canta
co' i nuoli che fâ 'l coro.*

*La bava de'l istae
al fresco de 'l umbria
de un verde che a casòn
el canta melodia.
Un giosso de aqua fresca
la femena te porta
e pùo, co' èla vissìn,
el resto no'l inporta.-*

“ I m’ à assûnto in spiaggia “

In ‘sti tinpi de miseria
a catâ un lavor xe bon,
de pagâ bolete he a miera
e anche un mutuo su’l gropòn:
vîvo in streto, quatro muri in Gravo vecio,
co’ la suocera in canton.

He do figi che i me studia
e anche ‘l can de mantignì,
la muger che spende e spande,
solo roba de “boutique”:
xe scoperto ‘l conto in banca, me son sùto,
no me resta che fâ un “check”.

(Ma) I m’ à assûnto in spiaggia, fâsso la stagion
I m’ à assûnto in spiaggia, vâgo a fâ ‘l bagnin
I m’ à assûnto in spiaggia, fâsso la stagion
I m’ à assûnto in spiaggia, vâgo a fâ ‘l bagnin

Vêmo duti de stâ in dieta
co’ brodini in consumè,
no se magna più buriti
ne bisteche o minestron:
me sòn duto in sansarele, pele e ossi,
co’ le braghe a picolòn.

Su la Mugia, a peverasse,
xe le guardie de scanpà
e su’l raso vâgo a ligni
‘che la stufa he de scoldâ:
no me basta più i asigni, sòn a remengo,
ormai devo ‘ndâ a fâ puff.

(Ma) I m’ à assûnto in spiaggia, fâsso la stagion
I m’ à assûnto in spiaggia, vâgo a fâ ‘l bagnin
I m’ à assûnto in spiaggia, fâsso la stagion
I m’ à assûnto in spiaggia, vâgo a fâ ‘l bagnin

“ La gnò canson “

**Còre svelto lungo ‘l stradòn
‘l tempo e la coriera.
Xe do zurni che no’ te vègo
e che tu manchi a scuola.
Za me manca ‘l tovo viso
la to’ vose e quel sorìso,
l’alegria de’l tovo rîe:
za tu me manchi tu.**

**Vèrzo i libri, vardo i quaderni:
no’ è vògia de studià,
la mia testa no’ la risponde
e penso solo a tu.
Vègo ‘i oltri che ‘i xe cuntinti,
co’ i pensieri ligai ben strinti
e le mane che le se strènze,
che le svola lontan.**

**Tra le pagine e i libri
sòra i banchi de scuola,
senpre in serca de tu
la mia ànema svola.
M’è ‘nventào ‘na canson
co’ la gnò fantasia,
la canson tu sòn tu:
xe la nostra poesia
ch’è ‘nparào za a memoria
e che canto ogni zorno
per tu, per tu ...**

**Còre svelto lungo ‘l stradòn
‘l tempo e la coriera,
vègo ‘l mar e l’orizzonte:
a Gravo vièn zó sera.
Tornarè a vèghe ‘l to’ viso
i to’ oci e ‘l tovo sorìso,
cantarè la gnò canson,
canson che tu sòn tu.**

**Corarè pe’ vèghe ‘l to’ viso
i to’ oci e ‘l tovo sorìso,
cantarè la gnò canson,
canson che tu sòn tu.**

“Noltri graisani ...”

I fiumi i còre e i spàca
la rocia e le montagne
ma quando i ‘rìva in mar
no’ i lassa che sabion.
E ‘sto sabion ‘l à fàto
i dossi e la laguna
e sora, de canèo,
issào vèmo ‘l cason.

Noltri graisani, vignui fora de ‘l mar,
brusai de ‘l sol e spacài de ‘i sirocai,
noltri che sèmo ‘npastài co’ fango e sal:
noltri graisani ...

(Coro: Noltri graisani, oh, noltri graisani ...
oh, noltri graisani, ...noltri graisani)

‘Ntè ‘l cuor vèmo la fede
e senpre ‘na preghiera,
’ntè ‘i oci vèmo ‘l mar,
el sol e nuoli a miera.
Cò i brassi i sburta i rimi
o ìssa su la vela
no’ i sente la fadìga
ma i pensa a la famegia.

Noltri graisani, vignui fora de ‘l mar,
brusai de ‘l sol e spacài de ‘i sirocai,
noltri che sèmo ‘npastài co’ fango e sal:
noltri graisani ...

(Coro: Noltri graisani, oh, noltri graisani ...
oh, noltri graisani, ...noltri graisani)

'Ntè 'l sangue, 'ntè le le vene,
ne score nobiltàe,
testardi ma orgogiusi
e Gravo senpre in cuor.
Ne piazze de fà festa
co' canti e compagnia,
pe' sconde la miseria
o lagreme che sìa.

Noltri graisani, vignui fora de 'l mar,
brusai de 'l sol e spacài de 'i sirocai,
noltri che sèmo 'npastài co' fango e sal:
noltri graisani ...

(Coro: Noltri graisani, oh, noltri graisani ...
oh, noltri graisani, ...noltri graisani)

De vîve su 'sto mar
xe stào 'l nostro destin,
e che pe' ninte a'l mondo
no' vèmo mai lassào.
Xe quà che resta l'anema
e che scrite xe le storie
de questa zente fiera,
bastarda e maledeta.

Noltri graisani, vignui fora de 'l mar,
brusai de 'l sol e spacài de 'i sirocai,
noltri che sèmo 'npastài co' fango e sal:
noltri graisani ...

(Coro: Noltri graisani, oh, noltri graisani ...
oh, noltri graisani, ...noltri graisani)



A.Tognon @ Copyright